

Eqqakkat pillugit Namminersorlutik Oqartussat nalunaarutaat

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. novembari 2011-meersumi (avatangiisinut inatsit) § 10, imm. 1-imi, nr. 5, 6, 12, 20, 23 aamma 25, § 40, imm. 1 aamma 2, § 45, imm. 2-4, § 56, imm. 1 aamma § 66 imm. 3 naapertorlugit aalajangersarneqarpoq:

Kapitali 1

Atuuffia

§ 1. Nalunaarummi eqqagassanik, tassungalu ilanngullugu immikkoortiterisarnerit, iluaqutissanngortitsisarnerit, igitsisarnerit atueqqittarnerillu, inatsimmi allami malittarisassiunneqanngitsut suliarinnittarneri pineqarput.

Imm. 2. Nalunaarummi atortut piffissami eqqagassanngorneriniit piffissamut eqqagassaaajunnaarnissaat tikillugu pilersaarusiorneqartarnerinut suliarineqartarnerinullu malittarisassat aalajangersarneqarput.

Kapitali 2

Nassuiaatit il. il.

§ 2. Nassuiaatit kapitalimi matumani saqqummiunneqartut nalunaarummut matumunnga, avatangiisinut inatsimmut eqqakkallu pillugit maleruagassanut allanut, taakku tunngavigalugit aalajangersarneqartunut, kiisalu kommunit eqqagassalerinerinut, tassungalu ilanngullugu kommunit eqqagassat pillugit maleruagassiaannut atuutsinneqarput.

§ 3. Eqqaaneq imatut paasineqassaaq, ilanngussaq 1 naapertorlugu atortussiaq pequlluunniit tigussaa-soq, piginnittup igitaa, igissallugu siunniussaa imaluunniit igissallugu pissussaaffigisaa.

Imm. 2. Nalunaarummi matumani maleruagassat aamma avatangiisinut inatsimmi § 36, imm. 1 naapertorlugit atortussiaq pigisalluunniit igitassaanersut kommunalbestyrelsip aalajangiffigisassavaa. Tassunga ilanngullugu kommunalbestyrelsi pisussaavoq, atortussiaq pigisarluunniit qanoq inissinneqassanersoq aalajangiissalluni.

Imm. 3. Taamaattorli nioqqutissiornerup ingerlanerani atortussianik pigisanilluunniit inuussutissarsiutigalugu tunisassiornerup inernerit eqqakkatut isigineqassanngillat, atortussiamik pigisamilluunniit taassuminnga sanaartorneq pingaarnertut siunnerfigineqanngippat, aamma:

1) atortussiaq pigisarluunniit atoqqinneqassasoq qularnanngippat,

2) atorussiap pequlluunniit nalinginnaasumik suliffissuarmi suliaasunut naleqqiullugu annertunerusumik suliarinngikkaluarlugu toqqaannartumik atorreqarsinnaappat,

3) atorussiaq pequlluunniit nioqqutissiornermut ilagitillugu sananeqarpat, aamma

4) atoqqinneqarnissaa akuerisaappat, tassalu atorussiap pigisalluunniit atorreqarnerani tunisassiornermik, avatangiisinik peqqissutsimillu illersuinermit piumasaqaatit attuumassutillit tamarmik naammassineqarpata, aammalu avatangiisit inuilluunniit peqqissusaannut ataatsimut sunniuteqarnerlussanngippat.

Imm. 4. Atorussiap pequtilluunniit eqqakkanut piumasaqaatinik ukuninnga naammassinnikkunnaarnerat pillugu kommunalbestyrelsi aalajangiisassaaq:

1) atorussiaq pequlluunniit iluaqutaalersinneqarluni naammassineqarpat, tassunga atoqqinneqarnera ilaatinneqarluni,

2) atorussiaq pequlluunniit siunertamut immikkoortumut nalinginnaasumik atorreqarpat,

3) atorussiamut peqummulluunniit taamaattumut niuerfimmik peqarpat imaluunniit piumaneqarpat,

4) atorussiaq pequtilluunniit siunertanut immikkut ittunut teknikkikkut piumasaqaatit naammassineqarpata, aammalu tunisassiamut tunngatillugu inatsisit najoqqutassallu atuuttut naammassineqarpata, aammalu

5) atorussiamik peqummilluunniit atuneq avatangiisinut inuilluunniit peqqissusaannut tamarmiusumut sunniuteqarnerlussanngippat.

Imm. 5. Kommunalbestyrelsip aalajangersakkami tassani imm. 3-4 naapertorlugit aalajangiinerit pillugit Naalakkersuisut ilisimatittassavaa.

§ 4. Atuisinnaatitaasoq tassaavoq nunaminertamik atuisinnaasoq, nalinginnaasumik nunaminertamik atuinissamik akuerineqartoq. Akuersisummik atuukkallartussamik imaluunniit ataavartussamik tunniussiornermut, kiisalu nunaminertanut sanaartorfunngitsunut eqqaasoqassappat tamanna atuutissaaq.

Imm. 2. Atuisinnaatitaanermut nallersuunneqassapput:

1) inissianik, illunik sumiiffinnillu inuussutissarsiutinik ingerlataqarfiusunik attartortut atuisullu, aamma

2) inissianik illunillu ineqarfissanik attartortut atuisullu, illuni attartortitakkani inissiat pingasuuppata ikineruppataluunniit.

3) illunik attartortitakkani, attartortitakkani pingasut sinnerlugit inissartaqartunik attartortitsarpata, attartortitsisut atuisussaaitaanermik piginnittutut isigineqassaaq.

Imm. 3. Aamma atuisinnaatitaasoq suliffeqarfinnut, peqatigiiffinnut aammalu ataavartumik imaluunniit atuukkallartussamik inunnut katersuuffissianik aqqissuussinernut aqqissuussisunut nallersuunneqassaaq.

§ 5. Atuisinnaatitaasoq kinaluunniit inoqutigiittut suliffeqarfittulluunniit aalajangigaassaaq. Atuisinnaatitaasoq inoqatigiinnut suliffeqarfimmulluunniit nallersuunneqarsinnaanersoq kommunalbestyrelsimit aalajangiiffigineqassaaq.

Imm. 2. Sullissiviit, umiarsualiviit assigisaallu suliffeqarfittut immikkoortinneqassapput.

Imm. 3. Nunaateqarfiit, nersutaateqarfiit, akunnittarfiit neriniartarfillu, aammalu asimi inuussutissarsitigalugu suliat allat suliffeqarfittut immikkoortinneqassapput.

Imm. 4. Kommunalbestyrelsip imm. 1 naapertorlugu, minnerpaamik aalajangiinermini tunngavissat uku tamarmiusut ilaatissavai:

1) Eqqagassat tamarmiusut amerlassusissaattut suussusissaattullu naatsorsuutigisat.

- 2) Suliassap piffissaq eqqarsaatigalugu sivilissusissaa.
- 3) Suliassami siunertaq.

§ 6. §§ 3-mi aamma 4-mi nassuiaatigineqartut saniatigut, nassuiaatit uku ukuunnga atorneqassapput:

- 1) Eqqakkanik iluaqutissanngortinneqarsinnaasut: Eqqakkat atoqqitassanngorlugit piareersarneqarsinnaasut, atoqqinneqarsinnaasut inaarutaasumik iluaqutissanngortitsinissamut atorneqarsinnaasut, imaluunniit passusseriaatsit taaneqartut arlaannik siunertaqarluni piareersarneqarsinnaasut.
- 2) Eqqagassalerinermut atortut: Atortut eqqakkanik iluaqutissanngortitsiviusartut piaaffiusartullu, taak-kununga atortut iluaqutissanngortitsinissaq paaanissarlunniit sioqqullugu eqqakkanik piareersaaffiu-sartut ilaatinneqarlutik.
- 3) Eqqaaviit: Eqqaavik, eqqakkat kommunip eqqakkanik katersuisarnerani katersuinissaq sioqqullugu igit-siviususaa.
- 4) Eqqakkanik immikkoortiterisarneq: Eqqakkat suuneri, katitigaaneri imaluunniit aallaavii tunngavigalugit immikkoortiterneqartarneri, soorlu asfalti, pappiaqqat, pappiaqqat qeratasuut, assakaasukut, saviminikut, atortut elektroniskiusut, batteriit akkumulatorillu, PVC-t, plastikkitt, igalaamernit, eqqakkat annoraaminernik gumminillu akullit, issut qisuillu.
- 5) Eqqakkanik piginnittoq: Eqqagassanik pilersitsisoq, imaluunniit inuk suliffeqarfilluunniit eqqakkanik pi-ginnittoq.
- 6) Eqqakkanik pilersitsisoq: Kinaluunniit suliaqarnermigut eqqakkanik pilersitsisoq imaluunniit piareer-saanermi, akoorinermi allatulluunniit suliaqarnermi eqqakkat suussusiinik katitigaanerinilluunniit allan-guisoq.
- 7) Eqqakkat suussusii: Eqqakkat ilanngussaq 1-mi eqqakkat allattorsimaffianni allassimasut, aammalu E-AK-kode-lerlugit allaaserineqartut.
- 8) Eqqakkanik assartuisoq: Kinaluunniit inuussutissarsiutigalugu allap akiligaanik eqqakkanik assartuisoq.
- 9) Uumasuneersunit eqqakkat: Eqqakkat uumasuneersut aamma uumasut toqungasut, taakkunungalu uumasut perlukui ilaatinneqarput.
- 10) Innersuussisarneq: Aaqqissuussineq maleruagassatigut aalajangigaasoq, tassanilu eqqakkanik pilersitsisoq eqqakkanik kommunalbestyrelsip innersuussinera malillugu eqqaavimmut akuerisamut tunniussinissamut akisussaaffeqarpoq.
- 11) Suliarinninneq: Iluaqutissanngortitsinerit paaanerillu, tassungalu iluaqutissanngortitsinissaq paaanis-sarlunniit sioqqullugu piareersaanerit ilanngullugit.
- 12) Atuisussaataaneq: Pisussaaffeqarfupput:
 - a) katersuisarnermut innersuussisarnermulluunniit aaqqissuussinermut malittarisassanik aalajangersar-neqartunik atuinnissaq, imaluunniit
 - b) eqqakkanik passussinissamut kommunalbestyrelsip innersuussutaanik aalajangersimasunik, katersui-sarnermut innersuussisarnermulluunniit aaqqissuussinernut ilaatinneqanngitsunik malinninnissaq.
- 13) Uumassusilinnit eqqakkat: Angerlarsimaffinnit, neriniartarfinnit, nerisassiuussisarfinnit aamma niuer-tarfinnit nerisassat igaffimmiillu eqqakkat arrorsinnaasut, kiisalu suliffeqarfinnit inuussutissaleriffiusunit eqqakkat assingusut, taakkunungalu naatsiivinnit eqqakkat, aalisakkanit aammalu uumasunit allanit eqqakkat ilaatinneqarput.
- 14) Eqqakkanik paaasarneq: Suliaq iluaqutissanngortitsiviunngitsoq sunaluunniit, aamma suliaq kinguneri-sassat ilaattut atortussianik katersueqqinnermik.

15) Illulianit sanaartukkanillu eqqakkat: Eqqakkat illulianit sanaartukkanillu pisut, taakkunungalu nutarterinerit, iluarsaassinerit isaterinerillu ilaatinneqarput.

16) Angerlarsimaffinnit eqqakkat: Eqqakkat angerlarsimaffinni pilersinneqartut, aqqissuussinernut allanut ilaatinneqanngitsut, aammalu pingaartumik tassaasut igaffimmit eqqakkat, eqqiluisaarnermi eqqakkat atortullu atorunnaakkanik minnerusunik ilaqartut, taakkunungalu nerisassat igitat sinnikullu allat, soorlu pappiaqqat, pappiaqqat qerasuut, plastikkit poortuutissallu, kiisalu aalisakkanit piniakkanillu, nammineq atugassatut pisanit piniakkanit eqqakkat.

17) Eqqakkat angerlarsimaffinnit eqqakkanut assingusut: Eqqakkat suliffeqarfinnit pilersinneqartut, kati-tigaanermikkullu inuinnaat angerlarsimaffinnit eqqakkanut assingusut.

18) Inissiiveqarfik: Sumiiffik eqqakkanik ataavartussamik utaqqiisaagallartumilluunniit inissiiviusoq, avatangiisinut inatsimmi kapitali 5 naapertorlugu avatangiisit pillugit akuersissuteqarfusimasoq.

19) Eqqakkat inissinneqarnissamut naleqquttut: Eqqakkat iluaqutissanngortitsinissamut imaluunniit iku-allaanissamut naleqqutinngitsut.

20) Toqqaannartumik atueqqiineq: Tunisassianik atortunillunniit, piareersaaqqaarani killiffik atorneqarsinnaasunik atueqqittarneq.

21) Eqqaavissuaq: Sumiiffik eqqakkanik piujuartussamik inissiiffiusussaq, avatangiisinut inatsimmi kapitali 5 naapertorlugu avatangiisit pillugit akuersissuteqarfusimanngitsaq.

22) Atortunit elektroniskiusunit saviminikut: Eqqakkat atortunit innaallagiamootunit elektroniskiusunillu pisut, taakkununga støvsugerit, qulliit elektroniskiusut, peerit sipaarutitallit, kissamik supoortut, kaffiliorutit, qillerutit, TV-kkut isiginnaarutit, qarasaasiat, radiut, mobiltelefonit kissarsuutillu ilaatinneqarlutik.

23) Poortuutit: Tunisassiat qanorluunniit ittut atortullu poortuinnermut, illersuinnermut, passussinnermut, tunisassiorturniit tunisassiassanik nioqqutissanilluunniit piareersakkanik nassiussinnermut, imaluunniit taakkuninnga saqqummiussinnermut atorneqartut. Atortut siunertamut ataatsimut ataasiaannarluni atorneqartut taamatuttaaq poortuutissatut isigineqassapput. Poortuutissanut taamaallaat ilaapput:

a) Tuniniaanermi poortuutit imaluunniit poortuutit pingaarnerit, tassalu tunitsivimmi poortuutit ataatsitut atuisussamut inaarutaasumut imaluunniit atuisartumut tunisassatut ilusiligaasut.

b) Tamanut poortuutit imaluunniit poortuutit pingaannginnerusut, tassalu tunitsivimmi poortuutit arlalinngorlugit tunisassatut ilusiligaasut, tassani atuisussamut inaarutaasumut imaluunniit atuisartumut tunisassatut ilineqarnerat imaluunniit tunitsivimmi ilisivinnik ulikkaarutaannartut atorneqarnerat apeqqutaattinnagu. Tassalu imaappoq, nioqqutissanit nioqqutissap piginnaanera allanngortinngikkaluarlugu peerneqarsinnaavoq.

c) Assartuinnermut poortuutit imaluunniit sullissinnermut atatillugu poortuutit, tassalu poortuutit tunitsivinni arlalinni imaluunniit poortuutit tamanut atorsinnaasunik atuinermi passussinissamik assartuinnermillu oqinnerulersitsisussanngorlugit ilusiligaasut, taamaallunilu inuup nammineerluni passussinerani assartuinneranilluunniit ajoqusiinissat pinngitsoortinneqarsinnaallutik. Assartuinnermut poortuutissanut containerit aqqusinertsigut, qimuttuitsut aqqutaasigut, umiarsuakkut silaannakkullu assartorneqartartut ilaatinneqanngillat.

24) Poortuutit igitassat: Poortuutit imaluunniit poortuutitut atortut suulluunniit, § 3 naapertorlugu eqqakkanut nassuiaatinut ilaatinneqartut, tassani tunisassiornermit igitassat kisimik pineqaratik.

25) Inuussutissarsiutinik ingerlataqarnermit eqqakkat: Eqqakkat suliffeqarfinnit pilersinneqartut, taakkununga eqqakkat angerlarsimaffinnit eqqakkanut assingusut, igitassat angisuut, inissialiordernermit sanaar-

tornermillu eqqakkat, tunisassiornermut eqqakkat, suliffissuarnit eqqakkat, eqqakkat immikkoortitikkat, issut nunalerinermiillu eqqakkat ilaallutik. Inuussutissarsiutinik ingerlataqarnermit eqqakkat ulorianar-tuusinnaapput uloriananngitsuusinnaallutilluunniit.

26) Eqqakkat ulorianaatillit: Eqqakkat ilanngussaq 1-mi eqqakkat allattorsimaffianni eqqakkatut uloria-naatilittut allassimasut nalunaaqutsersimasullu, aammalu ilanngussaq 2-mi allassimasutut ulorianaammik ataatsimik arlalinnilluunniit ersersitsisut. Aamma eqqakkat, ilanngussaq 2-mi allassimasutut ulorianaam-mik ataatsimik arlalinnilluunniit ersersitsiviusut eqqakkatut ulorianaatilittut isigineqarput.

27) Piareersaaneq: Iluaqutissanngortitsinissaq pīaanissarluunniit sioqqullugu timi, kissaq, akuutissat. ar-rortitsinerit imaluunniit iluaqutissanngortitsinissaq pīaanissarluunniit sioqqullugit suliat allat, taakkunun-galu ilaatinneqarput immikkoortiterineq, sequtserineq, eqiterineq, atortunik naqigussineq, panersiineq, aserorterineq, kissaatigisaq

malillugu ilusiliineq, immikkoortiterineq ilaallutik, aammalu iluaqutissanngortitsinissaq sioqqullugu pīaa-neq, poortueqqinneq, sequtserineq imaluunniit akulerussineq, taamaalillunilu eqqakkat annertussutsimik-kut ulorianassutsimikkullu annikillisinneqarnissaat imaluunniit allatut iliorluni passukkuminarnerulersin-neqarnissaat siunertaralugu piginnaasaannik allanngortitsineq.

28) Atueqqinnissaq siunertaralugu piareersaasaneq: Atueqqinnissaq siunertaralugu piareersaaneq: Ilua-qutissanngortitsinermik suliaqarnerit suulluunniit nakkutilliinertut, saliinertut iluarsaassinertulluunniit ittut, tassanilu nioqqutissiat imaluunniit nioqqutissiat atortui eqqagas-sanngorsimasut piareersarneqartarput, taamaalillutillu allatut piareersarneqaratik atoqqinneqarsinnaa-sunngortinneqartarlutik.

29) Eqqakkat ikuallanneqarsinnaasut: Eqqakkat iluaqutiginneqarsinnaanngitsut aammalu ikuallaanikkut peerneqarsinnaasut, ikuallanneqanngikkunik ikuallaavimmut piumasaqaatinik unioqqutitsiviusinnaasut, imaluunniit akuutissanik avatangiisinut peqqissutsimullu akuerineqarsinnaanngitsunik annertussusilinnik aniatitsisinnaasut.

Eqqakkanut ikuallanneqarsinnaasunut ilaatinneqanngillat:

a) Eqqakkat, inatsisit malillugit ikuallanneqarnissaanut inerteqqutaasut.

b) Eqqakkat inatsisit malillugit, tassungalu malittarisassat kommunalbestyrelsimit akuerineqartut ilan-ngullugit katersorneqassapput imaluunniit suliarinniffissamut allamut pīaanermiluunniit aaqqissuussinermut allamut innersuunneqassallutik, taakkunungalu iluaqutissanngortitsinerit inissiinerilluunniit ilaatinneqarput.

30) Isumaqtiginninniartoq: Inuk suliffeqarfilluunniit, niuernermik tunngaveqarluni eqqakkanik niuerute-qartoq.

31) Misileraanermik tunngaveqarluni immikkut aaqqissuussineq: Aaqqissuussineq, piffissami sumiiffimmiluunniit killilikkami immikkoortunik ataatsinik arlalinnilluunniit aaqqissuussinerup sumiiffimmut annertunerusumik siaruarneqarsinnaaneranik ataavartunngortinneqarsinnaaneranilluunniit misissuinissaq siunertaralugu atorneqartoq.

32) Eqqakkat atoqqinneqarsinnaasut: Eqqakkat atoqqinneqarnissaminut naleqquttut, imaluunniit inatsi-sit malillugit atoqqinneqartussat.

33) Atoqqiineq: Iluaqutissanngortitsiniarluni suliaqarneq sunaluunniit, eqqakkanik tunisassiassanut, ator-tussanut akuutissanulluunniit allanngortillugit piareersarneqarfiat, taakku aallaqqaammut siunertaasumut siunertanulluunniit allanut atorneqarnissaat apeqquaatinnagu. Tassunga atortunik arrorsinnaasunik, kisi-

annili nukissiornermut atorneqartussaangitsunik piareersaaneq aamma atortunik ikummatissatut im-miissutissatulluunniit atorneqartussanik piareersaaneq ilaatinneqarput.

34) Atoqqitassanik katersivik: Atortoq atoqqitassanik suliaqarnermut atorneqartoq.

35) Atoqqiisarneq: Suliaq sunaluunniit, nioqqutissiat atortulluunniit siunertamut ilusilerneqarfimminut a-toqqinneqarnissaannik suliaqarfusoq.

36) Angerlarsimaffinnit eqqakkat: Eqqakkat angerlarsimaffinni pilersinneqartut, taakkununga angerlarsi-maffinnit eqqakkat, eqqakkat angisuut, naatsiivinnit eqqakkat, eqqakkat immikkoortitikkat issuillu ilaallu-tik. Angerlarsimaffinnit eqqakkat ulorianartuusinnaapput ulorianangitsuusinnaallutilluunniit.

37) Passussineq: Eqqakkanik katersuisarneq, iluaqutissanngortitsisarneq paaasernerlu, taakkununga ta-matumunnga atatillugu aammalu inissiiveqarfimmi suliareqqiisarnermut kiisalu tuniniaasut akunnermuliuttullu suliaannut nakkutilliinerit ilanngullugit.

38) Katersuineq: Eqqakkanik aallerneq, tassungalu eqqakkanik ikuallaavimmut assartuussinissaq siunerta-ralugu aallarniutaasumik inissititerineq ilanngullugit.

39) Katersuisarnermi aaqqissuussineq: Aaqqissuussineq malittarisassatigut aalajangersagaasoq, tassanilu eqqakkat tunniussivissamut katersuivimmulluunniit tunniunneqarpata passussinerup ingerlateqqinneqarnissaanut akisussaaffik kommunalbestyrelsip tigussavaa.

40) Suliffeqarfik katersuisartoq: Suliffeqarfik niuernermik siunnerfeqarluni eqqakkanik katersuisartoq.

41) Akuutissat igitassat: Suliffissuarmi suliffinnit kukkusumik tunisassiornermi igitassat aamma akuutissat atornikut, aammalu laboratorianit igitassat akuleriit assigisaallu, kiisalu angerlarsimaffinnit akuutissat nali-ginnaasut, soorlu arrorsaatit qalipaattillu sinnikui.

42) Eqqakkanik immikkoortiterisarneq: Sumiiffimmi eqqakkat aqqusaagaanni immikkoortiterisarneq, tassungalu atortut atuuffissallu malillugit immikkoortiterisarneq ilaatinneqarpoq.

43) Nakorsiartarfinnit eqqakkat ulorianartut: Eqqakkat tunillaanneqarnissamut ulorianartorsiorfusinnaa-sut allatulluunniit peqqissutsimut immikkut ittumik ulorianartorsiorfusinnaasut.

44) Kommunip eqqagassanik passussisarfia: Kommunip eqqakkanik passussisarfia, kommunalbestyrelsip ataatsip amerlanerusulluunniit passussiasarfiup annersaanik piginneqataaffigisaat, imaluunniit ingerlatse-qatigiiffimmi assigisaanilluunniit eqqakkanik suliaqarnermi atortumik pigisaqartumi aningaasaatit anner-saannik toqqaannartumik toqqaannangitsumillunniit pigisaqarfisaa.

45) Akunnermuliuttoq: Suliffeqarfik sunaluunniit, allat sinnerlugit, taakkunungalu akunnermuliuttut namminneerlutik eqqakkanik tiguisussaangitsut ilanngullugit, eqqakkanik suliaqarnissamik aaqqissuus-sisoq.

46) Iluaqutissanngortitsineq: Suliaq sunaluunniit, eqqakkanik atoqqiinnermi, atueqqinnermi allatulluunniit suliaqarnermi atortunik allanik atuinnermik taarsiinikkut iluaqutissanngortitsiviusoq, taakkunungalu suliat eqqakkanik taamatut iluaqutissanngortitsinissamut piareersarfusut ilaatinneqarput.

47) Uuliakut: Suliffissuarnit uuliat imaluunniit uuliat atortussianit inuilluunniit pilersitaannit pisut suul-luunniit, siunertanut aallaqqaammut atuuffigisaminnut naleqqukkunnaarsimasut, soorlu motoorinut ikum-matitsivinnut aqquersuutinullu uuliat, kiisalu maskiinanut, turbininut atortunullu hydraulik-imik ingerlati-linnut uuliat.

48) Eqqakkat angisuut: Eqqakkat anginerit, soorlu pequtit, sisoraatit, sikkilit, igaffimmi atortut innaallagia-moortut, savimernit saffugassallu, dunkit madrassillu. Tassanili illuliornermit sanaartornernillu eqqakkat pineqanngillat.

Kapitali 3

Eqqagassanik pilersitsisartut

§ 7. Eqqagassanik pilersitsisut pisussaapput, nalunaarut manna kommunit eqqagassalerinermut malittarisassiaat kommunalbestyrelsillu inassuteqaataat malillugit eqqakkanik isumaginissallutik, immikkoortiterissallutik piaassallutillu.

Kapitali 4

Eqqagassanik tunngaviusumik pilersarusiornermi tulleriissaarineq il.il.

§ 8. Eqqakkanik passussinermi eqqagassanik tunngaviusumik tulleriiaarisarnek uku aallaavigineqartasapput:

- 1) Eqqagassanngortitsinaveersaarnek.
- 2) Atueqqinnissaq siunertaralugu piareersaarnek.
- 3) Atoqqiisarnek.
- 4) Allatut iluaqutissanngortitsineq.
- 5) Piiaaneq.

Imm. 2. Eqqakkanik passussinermi eqqagassanik tunngaviusumik tulleriiaarisarnek saneqqunneqarsinnaavoq, tunngavissat immikkut ittut, soorlu teknologi nutaaq, aningaasaqarnermi eqqarsaatigisassat amerassutsikkullu eqqarsaatigisassat tamatumunnga tunngavissiippata, aammattaaq tak. imm. 3-mi tunngavissat.

Imm. 3. Eqqakkanik passussinermi eqqagassanik tunngaviusumik tulleriiaarisarnermik atuineq taassuminngalu saneqqutsineq avatangiisini inuiaqatigiillu aningaasaqarneranni tamarmiuserni angusassat pitsaanerpaat anguneqarnissaat siunertaralugu.

Kapitali 5

Mingutsitsinermit atatillugu akisussaaffiit pisussaaffillu

§ 9. Kinaluunniit eqqakkanik passussisoq passussinermi silaannarmut, imermut, sikumut, qaqqamut nunamulluunniit mingutsitsinnginnissamut tamatumunngaluunniit ulorianartorsiortitsilinnginnissamut akisussaasuvoq.

§ 10. Kinaluunniit silaannarmut, imermut, sikumut, qaqqamut nunamulluunniit uuliamik, akuutissanik igitassanilluunniit allanik mingutsitsisoq erngerluni tamanna pillugu kommunalbestyrelsimut nalunaaruteqassaaq.

Imm.2. Mingutsitsinermit akisussaasuusup mingutsitsinerup kingunissaannik pinngitsoortitsiniaassaaq, imm. 1 naapertorlugu nalunaaruteqartoqarsimagaluarpalluunniit.

Imm. 3. Mingutsitsinermit akisussaasuusoq uuliap, akuutissat eqqakkalluunniit ulorianaatillit katitigaaneri, amerlassusaat il.il. pillugit paasissutissanik attuumassutilinnik tamanik kommunalbestyrelsimut ilisimatissuteqassaaq.

Kapitali 6

Eqqakkat pillugit pilersaarusiortarneq nalunaarsuisarnerlu

§ 11. Kommunalbestyrelsi ukiut sisamakkaarlugit kommunimi eqqakkanik passussisarnermut ukiunut 12-inut pilersaarusiortassapput. Pilersaarut, Naalakkersuisunut akuerisassanngorlugu saqqummiunneqartussa-q ukuninnga imaqaassaaq,

- 1) Immikkoortoq nalunaarsuinerlut tunngasoq, ukiumut ilivitsumut qaangiuttumut kommunimi eqqagassalerinerup killiffianik allaaserisaqarfusoq, tak. § 12,
- 2) Immikkoortoq anguniakkanut tunngasoq, kommunalbestyrelsip eqqagassalerinermi anguniagaannut pingaarnernut nassuiaateqarfusoq, aamma
- 3) Immikkoortoq pilersaarusiortarnermut tunngasoq, piffissami nalunaarsuiofiusumi ukiunut sisamanut siulernut pilersaarusiortarneq immikkut aallussiviusoq, tak. § 13.

Imm. 2. Kommunit eqqagassalerinerlut pilersaarutaat nuna tamakkerlugu eqqagassalerinerlut pilersaarutit aallaavigalugit suliarineqassapput, taakkulu taakkununga uniuutissanngillat.

Imm. 3. Kommunalbestyrelsi nalunaarsuinissanut piumasarineqartunut paasissutissanik peqanngippat, Naalakkersuisut saneqqutsitsinissamut immikkut ittumik akuersissuteqarsinnaapput, taannalu malillugu kommunalbestyrelsi sapinngisaminik pitsaanerpaamik naliliilluni nalunaarsuissaaq. Taamatut pisoqartillugu aamma kommunalbestyrelsi paasissutissat piumasarineqartut siunissami qanoq iliorluni pissarsiniartarnissaminik eqqarsaateqarnerluni nassuiaateqartussaavoq.

Imm. 4. Immikkut ittunik eqqarsaatigisassaartoqarpat, Naalakkersuisut anguniagaqarnissamut pisisaaffimmik saneqqutsitsinissamut immikkut ittumik akuersissuteqarsinnaapput.

Imm. 5. Immikkut ittunik eqqarsaatigisassaartoqarpat, Naalakkersuisut pilersaarusiortarneqarnissamut pisisaaffimmik saneqqutstsinissamut immikkut ittumik akuersissuteqarsinnaapput.

§ 12. Kommunip eqqagassanik passussinerata immikkoortua nalunaarsuinissamut tunngasoq ukuninnga imaqaassaaq:

- 1) Kommunimi eqqakkat pilersinneqartut amerlassusiisa ataatsimut nalunaarsorneri aammalu qanoq eqqagassat iluaqutissanngortinneqarnerlut iginneqarnernulluunniit pillugu allaaserinninneq, imatut agguarlugit
 - a) eqqakkat inuussutissarsiutinik ingerlataqartunit aamma inuinnarnit pisut,
 - b) ilanngussaq 1 naapertorlugu eqqakkat suuneri (EAK-kodit), imaluunniit
 - c) eqqakkat immikkoortitikkat.
- 2) eqqakkat kommunimut tikisinneqartut imaluunniit kommunimiit nassiunneqartut amerlassusaannut nalunaarsukkat, suussusaannut agguarlugit,
- 3) eqqakkanik katersuisarnerlut innersuussisarnermullu aaqqissuussinermi nalunaarsukkat nassuiaatillu,
- 4) tigooraavinnut, inissiivinnut ikuallaavinnullu il.il. kommunimi inissisimasunut nalunaarsukkat nassuiaatillu, taakkununga qanoq issusii, pisinnaasaat il.il. inissaqartitsisoqarsimasinnaanera ilanngullugit, aamma
- 5) kommunip eqqagassalerinerlut aningaasartuutaat pillugit nassuiaat, taakkununga ingerlatsinerlut aserfallatsaaliuinernullu aningaasartuutit ilanngullugit.

§ 13. Immikkoortoq pilersaarusiornermut tunngasoq minnerpaamik uku pillugit nassuiaammik ilaqartin-neqassaaq:

- 1) Siunissami kommunimi eqqagassat amerlassusissaannut missiliuineq.
- 2) Eqqakkanik immikkoortunik katersuisarnermut aaqqissuussinerit suut kommunalbestyrelsimit aallarti-tassatut eqqarsaatigineqarnersut.
- 3) Kommunimi eqqagassalerinermut atueqqittarnermullu atortut ingerlanneqarnissaannut aserfallatsaali-orneqarnissaannullu pilersaarutit.
- 4) Eqqagassalerinermut atueqqittarnermullu atortut suut sananeqartussatut, aamma suut atorunnaarsin-neqartussatut pilersaarutigineqarnersut. Taakkununga siunissami eqqakkat amerlassusissaatut naatsorsuutigisat tunngavigalugit pisinnaasat ilassutissaannik sananissamut pisaria-qartitat, atortut atorineqartut pisinnaasaannut piffissamullu atasinnaaffinut sanilliunneqarneri ilanngullugit.
- 5) Pilersaarutip kommunalbestyrelsip missingersuutaan eqqagassanullu akiliutit amerlassusaannut ani-ngaasaqarnikkut kingunerisassai.
- 6) Siunissami iluarsaassinissamut, allanngortiterinissamut imaluunniit passussivinnik nutaanik sananissa-mut aningaasaliissutissatut pilersaarutigineqartut.
- 7) § 8 naapertorlugu eqqagassanik tunngaviusumik pilersaarusiornermi tulleriiaarineq naapertorlugu ili-uusissatut pilersaarusiat qanoq annertutigisumik atorineqarnissaannik naliliineq.

§ 14. Kommunalebestyrelsip kisimiilluni imaluunniit kommunalebestyrelsit allat suleqatigalugit kommunit ataatsimoorlutik eqqakkanut ingerlatseqatigiiffimmut eqqakkanut pilersaarut, § 11-mi taaneqartoq tamakkerlugu ilaannaaluunniit suliariniarlugu aalajangiutissappagu, eqqakkanut pilersaarut kommunalebestyrelsinit ataasiakkaanit akuerineqassaaq.

Imm. 2. Aamma kommunalebestyrelsit ataasiakkaat eqqakkanut pilersaarummi, kommunit ataatsimoorlutik eqqakkanut ingerlatseqatigiiffianit suliarineqartumi kommunini eqqakkanut pilersaarusiorinissamut piumasaqaatit sukkulluunniit atuuttut malinneqarnissaasa qulakkeerneqarnissaa akisussaaffigaat.

Kapitali 7

Nalunaarsuisussaataitanermut- paasissutissiisussaataitanermut nalunaaruteqartussaataitanerlu

§ 15. Eqqagassanik assartuisartut eqqagassanik assartuinissamut pilersaaruteqarunik piffissat qanoq ili-nerini assartuinissamik pilersaaruteqarnerlutik kommunalebestyrelsimut nalunaarutigissavaat. Eqqagassanik assartuisartut akuttunngitsumik eqqagassanik assartuisarunik piffissap qanoq ilinerani eqqagassanik assartuisassanerlutik nalunaarutigiiinnarsinnaavaat.

Imm. 2. Sulliffeqarfiit § 6, imm. 37 naapertorlugu eqqakkanik passussisartut, aammalu avatangiisinut inat-simmi kapitali 5 naapertorlugu akuerineqartussaataitaangitsut, piffissat qanoq ilinerini eqqakkanik pas-sussinissaq pilersaarutiginerlugu kommunalebestyrelsimut nalunaarutigissavaat.

Imm. 3. Suliffeqarfiit imm. 1-imi aamma 2-mi taaneqartut kommunalebestyrelsimit qinnuigineqarnerminni eqqagassat assartorneqartut suliarineqartullu amerlassusaat, katitigaanerat immikkoortitigaanerallu pillu-gu paasissutissanik tunniussissapput.

§ 16. Kommunalbestyrelsip suliffeqarfiit paasissutissanik, kommunalbestyrelsip malittarisassiamini allaserisaanik tamanik, eqqagaatimik katitigaaneritut suliarineqartarnerinullu tunngasunik, kommunalbestyrelsip avatangiisinut illersorsinnaasumik suliaqarnissaanut qulakkeerisinnaasunik tunniussinissamut pisisaaffilersinnaavai.

Imm. 2. Eqqakkat amerlassutsimikkut, katitigaanermikkut piginnaaneqarnermikkullu annertuumik allanguuteqarpata, suliffeqarfiit imm. 1-imi pineqartut erngerlutik tamanna pillugu kommunalbestyrelsimut nalunaaruteqassapput.

§ 17. Kommunalbestyrelsip minnerpaamik ukiumut ataasiarluni kommunip ukiumoortumik eqqagassalerinermut aningaasartuutai tamarmiusut pillugit paasissutissat Naalakkersuisunut nassiuttassavai.

Kapitali 8

Malittarisassioortussaataaneq

§ 18. Kommunalbestyrelsi malittarisassanik ataatsinik amerlanerusunilluunniit suliaqassapput, eqqakkat kommunimi atuisinnaatitaasunit pilersinneqartut katersorneqartarnerinut innersuunneqartarnerinullu aaqqissuussinernik allaaserisaqarfiusunik.

§ 19. Kommunalbestyrelsi eqqakkanut katersuisarnermut aaqqissuussinermut malittarisassanut ilaasunut najoqqutassanik imaattunik aalajangersaassaaq:

- 1) Katersisarnermut aaqqissuussinerit annertussusaat.
- 2) Katersisarnermut aaqqissuussinerup piareersagaanera.
- 3) Eqqakkat immikkoortuini taaneqartuni immikkoortiterinissamut piumasaqaatit.
- 4) Eqqakkanik ulorianaatilinnik angerlarsimaffinnit eqqakkanut naliginnaasunut ilanngullugit igitsinissamut inerteqquteqarneq.
- 5) Aaqqissuussinermut peqataanermut akiliutip akilerneqartarnera.

Imm. 2. Tamatuma saniatigut kommunalbestyrelsi makku pillugit najoqqutassanik aalajangersaassinnaavoq:

- 1) Atuisinnaatitaasup eqqaavinnik pisinissamut, ikkussinissamut aserfallatsaaliuinissamullu pisussaaffeqarnera.
- 2) Eqqakkanik pilersitsisartunut ataasiakkaanut eqqaaviit ilusissaat suussusissaallu.
- 3) Eqqaaviit amerlassusissaat, tassungalu inissiffissaat ilanngullugit.
- 4) Eqqaavinnik immiisarneq.
- 5) Eqqaavinnik eqqaanilu eqqiluisaartitsineq, taakkununga aputaajaasarneq ilaalluni.
- 6) Eqqaavinnik imaarsisarneq.
- 7) Eqqakkat angisuut.
- 8) Eqqakkanik atoqqinneqarsinnaasunik passussineq.
- 9) Eqqakkat pillugit paasissutissat, taakkununga eqqakkanik ikuallanneqarsinnaasunut eqqakkanillu atoqqinneqarsinnaasunut immikkoortiterisoqarsimanersoq ilaatinneqarluni.
- 10) Eqqakkanik passussinissamut maleruagassat immikkut ittut, sullivimmi avatangiisini passussisarner-

milu ajornartorsiutinik tunngavilersugaasut.

11) Misiliummik aaqqissuussinerit.

Imm. 3. Aammattaaq kommunalbestyrelsi eqqakkanut innersuussisarnermi aaqqissuussinermut ilaasunut makkununga piumasaqarsinnaavoq:

1) Eqqakkat poortorneqarnissaat.

2) Eqqaaviit nalunaarsorneqarnissaat.

3) Eqqakkat uninngatinneqarnissaat.

4) Piareersarnissaat.

5) Eqqakkanut utaqqiisaannaagallartumik toqqorsinissamut imaluunniit inissiinissamut innersuussisarneq.

6) Eqqakkanik nalunaarutiginnittarneq.

Kapitali 9

Eqqakkanut aaqqissuussinerit

§ 20. Kommunalbestyrelsi eqqakkanut aaqqissuussinernik pilersitsissaaq, kommunip eqqakkanut malittarisassaani allassimasussanik, takuuk kapitali 8.

Imm. 2. Aaqqissuussineq imm. 1 naapertorlugu pilersinneqartoq katersuisarnermut innersuussisarnermullu aaqqissuussinertut pilersinneqassanersoq kommunalbestyrelsip aalajangissavaa. Katersuisarnermut aaqqissuussineq, aasassatut- tunniussivittullu aaqqissuussineq pilersinneqarsinnaavoq.

Imm. 3. Kommunip aaqqissuussinera aallartinneqarpat, aaqqissuussinermut peqataasut tamarmik aaqqissuussinermik atuinissaq pisussaaffigilissavaat.

§ 21. Kommunalbestyrelsip illoqarfinni nunaqarfinnilu tamani ukununga katersuisarnermut innersuussisarnermullu aaqqissuussinermi, aasassatuttunniussivissatullu pilersitsinissaq qulakkiissavaa:

1) Angerlarsimaffinnit eqqagassat aamma eqqagassat angerlarsimaffinnit eqqakkanut assingusut.

2) Eqqakkat ulorianaatillit.

3) Eqqakkat angisuut.

4) Ujaqqat, issuit ujaraaqqat, sanaartornermi atortut immiissutissallu allat iluaqutissanngortinneqarsinnaasut.

5) Saviminikut saffugassakullu.

6) Toqqaannartumik atoqqitassat.

7) Qimmit uumasullu minnerit allat timaanniit igitassat.

Imm. 2. Kommunalbestyrelsi katersuisarnermi aaqqissuussinernik imm. 1-imi allassimasut saniatigut allanik pilersitsisinnaapput.

Imm. 3. Atuisinnaatitaasup eqqakkat, aaqqissuussinerit kommunip eqqakkanut malittarisassaani allassimasut naapertorlugit immikkoortiterneqarnissaat qulakkiissavaa.

§ 22. Kommunalbestyrelsi eqqakkanik, kommunimi eqqakkanik katersuisarnermut innersuussisarnermullu aaqqissuussinernut ilaatinneqanngitsunik tunniussivissanikinnersuussissaaq. Innersuussut eqqakkanik passussinissamut piumasaqaatinik, kommunalbestyrelsimit pisariaqartutut isumaqarfigineqartunik

imaqarsinnaavoq, taakkunungalugu eqqakkat immikkoortunut immikkoortiterneqarnissaat piumasaqaat ilaatinneqarpoq.

Imm. 2. Eqqakkat piginnaanerini aalajangersimasunik naliliineq tunngavigalugu innersuussisoqassaaq.

Imm. 3. Passusseriaatsit innersuunneqartut atorineqassapput. Tamatumani pappiaqqat eqqakkat, paasisutissanik isertuussanik imaqtut pineqanngillat. Qanoq ilinerani pappiaqqat eqqakkat paasisutissanik isertuussanik imaqtussaansut suliffeqarfiit namminneerlutik aalajangissavaat.

Imm. 4. Eqqakkat kommunalbestyrelsi innersuussutai naapertorlugit immikkoortiterneqarsimanerat passunneqarsimanerallu atuisinnaatitaasup kommunalbestyrelsimut uppersassavaa.

Imm. 5. Eqqakkat eqqortumik suussusersineqartarnissaat passunneqartarnissaallu qulakkeerniarlugu, kommunalbestyrelsi suliffeqarfiit peqqusinnaavai, eqqakkanik taakkulu katitigaanerini misissueqqullugit.

Imm. 6. Kommunalbestyrelsi eqqakkanik innersuunneqartunik suliaqarnissaq pillugu tigooraavimmut avatangiisit pillugit akuerisamut isumaqatigiissuteqarsinnaavoq, taakkunungalugu eqqakkanik atoqqitassat innersuunneqartussanik tigooraasarnissaq pillugu isumaqatigiissutit ilaatinneqarput.

Kapitali 10

Kommunit eqqakkanik aqqissuussinerannik atuisussaataaneermut pisussaaffeqarunnaartitaaneq

§ 23. Suliffeqarfiit eqqakkanut ulorianaatilinnut tunngatillugu atuinissamut pisussaaffeqarunnaartitaaneq pillugu qinnuteqarsinnaapput.

Imm. 2. Qinnuteqartoqareernerani suliffeqarfiup nammineerluni iliuuseqarnermini suliffeqarfiup eqqakkat ulorianaatillit avatangiisinut illersorneqarsinnaasumik isumagisnaallugit uppersarsinnaappagu, suliffeqarfik § 20, imm. 3 aamma § 22, imm. 3 naapertorlugu atuisussaataaneermut pisussaaffeqarunnaarsinneqartoq kommunalbestyrelsi suliffeqarfimmut nalunaaruteqarsinnaavoq.

Imm. 3. Kommunalbestyrelsi uppersaatissatut atortumut eqqakkanik pineqartunik suliaqarsinnaasumut, avatangiisit pillugit akuersissuteqarfusumut isumaqatigiissutip assilineranik piniassaaq.

Imm. 4. Pisussaaffeqarunnaarsitaaneq ukiuni tallimani, imaluunniit atortumut avatangiisit pillugit akuersissuteqarfusumut pineqartumut isumaqatigiissutip atorunnaarnissaata, atortulluunniit avatangiisit pillugit akuersissummik annasaqarnissaata tungaanut atuutissaaq.

Imm. 5. Suliffeqarfik pissutsinik imm. 4-mi allaaserineqartunik allannguuteqartoqartillugu kommunalbestyrelsimut ilisimatitsinissamut pisussaaffeqarpoq.

Kapitali 11

Kommunalbestyrelsi akiliutinik aalajangersaasernerani akiligassiiserneranilu tunngaviusut

§ 24. Eqqakkanut akit akit allattorsimaffianni aajangersarneqassapput. Akit allattorsimaffiat kommunalbestyrelsimut akuerineqassaaq aammalu kommunip nittartagaatigut tamanut ammasumik saqqummiunneqassalluni.

§ 25. Akiligassat, nalunaarummi matumani taaneqartut avatangiisinut inatsimmi kapitali 7-imi akiliutinut malittarisassat naapertorlugit akilersinneqartassapput.

§ 26. Kommunalbestyrelsi akiliutitut tunngaviusunut atuisinnaatitaasumut akileeqqusissaaq.

Imm. 2. Akiliutitut tunngaviusut - akiliutit agguaatigiissinneqarnerat tunngavigalugu aaliangersarneqas-sapput. Kommunalbestyrelsip akiliutitut tunngaviusut ukununga aningaasartuutit matussutissanik imaqtartissinnaavai:

- 1) Allaffissorneq.
- 2) Misileraanermi aaqquussuussinerit
- 3) Malittarisassanik aalajangersaaneq.
- 4) Eqqagassalerinermi paasissutissanik katersineq.
- 5) Paasititsiniaaneq.
- 6) Piumasaqaatit § 30-mi allassimasut tunngavigalugit immikkoortitsineq.
- 7) Angerlarsimaffinnit eqqakkanik passussinissamut innersuussutit aalajangersimasut.
- 8) Pilersaarutit aqutsinerillu, aaqquussuussinernut ataasiakkaanut tutsinneqarsinnaanngitsut.
- 9) Kommunit eqqaaveqarfiinik nakkutillineq, matusineq suliareqqiinerlu.

§ 27. Kommunalbestyrelsi kommunimi atuisinnaatitaasunut, aaqquussuussinernut ilaatinneqartunut tamanut katersuisarnermut innersuussisarnermullu aaqquussuussinernut akiligassanik aalajangersaassaaq akiliisitsisassallunilu. Aallersinnaanermik oqqussisinaanermillu aaqquussuussineq ilaalluni

Imm. 2. Katersuisarnermut aaqquussuussinerni aallertarnermut aaqquussuussinernut akiliutissaaq, kiffartuus-sineq angerlarsimaffinnut atugassiissutigineqartoq, eqqakkat aaneqartartut oqimaassusaannik, eqqaaviit imartussusaannik, imaarsisarnerup akulikissusianik tunngavis-salluunniit taakku ataatsimoortinnerinik tunngaveqartoq tunngavigalugu aalajangersarneqassaaq. Kom-munalbestyrelsi tunngavissanut ilaliussassanik, atuisinnaatitaasut ataasiakkaat aaqquussuussinernut artuk-kiisarneranut, soorlu eqqakkat suussusaannut amerlassusaannulluunniit tunngasunut naleqquttunik aala-jangersaasinnaavoq. Kommunalbestyrelsi – immikkut aaqquussusaanut tunngatillugu immikkut ittumik akileeqqusisinaanngilaq.

§ 28. Kommunalbestyrelsi akit allattorsimaffianni suliffeqarfinnit eqqakkanut, tigooraavinni, eqqaavissu-arni, inissiivinni nakkutigisani, ikuallaavinni kommunimiluunniit avatangiisit pillugit suliaqarfinni allani tigu-neqartunut tigusarnermut akiliutit aalajangersaassaaq.

Imm. 2. Akiliutit eqqakkat immikkoortiterneqarnerisa pitsaassusaannut, amerlassusaannut suussusaannul-lu naapertuutissaaq.

Imm. 3. Eqqakkat ulorianaatillit tamatigut eqqakkanit allanit immikkoortinneqartassapput, aammalu kommunip eqqakkat suliarineqarnissaannut qulakkeeriniarluni aningaasartuutissai eqqarsaatigalugit im-mikkut akilersinneqartassallutik.

Imm. 4. Eqqakkat ulorianaatillit eqqakkanit allanit immikkoortinneqarnissaat suliffeqarfiup qulakkeersi-manngippagu, eqqakkat suliffeqarfiup akiligaanik kommunalbestyrelsimit isumagineqarlutik immikkoorti-terneqassapput.

§ 29. Kommunalbestyrelsi saniatigut aningaasartuutitut, eqqakkanik pilersitsisunit ataasiakkaanit kom-munalbestyrelsimut akiligassanngortitsisunut immikkut ittumik

akiliutissanik aalajangersaasinnaapput akiliisitsisinnaallutillu, taakkunungalugu atuisinnaatitaasup eqqunngitsumik immikkoortiterineranut aningaasartuutit imaluunniit atuisinnaatitaasumut eqqagassanik aallernermut tunngasunik saniatigut aningaasartuutit ilaatinneqarput.

Imm. 2. Kommunalbestyrelsi atuisussaataaernermut piginnittunut nalunaajaatigissallugu, akiliutissaq qaanoq iliorluni naatsorsorneqarsimanersoq atuisinnaatitaasumut nassuiaateqarfigissallugu.

§ 30. Akiliutissanik aalajangersaanermi kommunalbestyrelsi aningaasaliiffissanut pilersaarutaasunut immikkoortitanut ilaatitsisinaavoq,

- 1) kommunalbestyrelsi atortunik iluarsaassinissamut, allanngortiterinissamut imaluunniit nutaanik sananissamut aalajangiisimappat,
- 2) kommunalbestyrelsi aningaasaliiffissat annertussusaannut missingersuutit aningaasaliiffissamullu aningaasalersuinissamut pilersaarut tunngavigalugu aalajangiisimappat, aamma
- 3) aningaasaliiffissaq kommunimi eqqagassalerineranut pilersaarummi atuuttumi allassimappat.

Kapitali 12

Nunaminertat silamiittut saligaatsuutinneqarnerat aamma eqqaavinnik atuisarneq il.il.

§ 31. Illuni ataasiakkaani eqqagassat eqqaavinnut, illut pigisalluunniit ataasiakkaat qanitaannut inissinneqarsimasunut katersorneqartassapput.

Imm. 2. Eqqakkat sumiiffimmut, eqqaavilerisunit ukioq kaajallallugu tikikkuminartunngorlugit aqqusineqartumut inissinneqassapput.

Imm. 3. Eqqaavinnik quimut immikkut ittumut assigisaanulluunniit, pisortat aqqusinniutaasa illullu akornanni qaninnerpaamiittumut inissiinissaq kommunalbestyrelsip akuerisinnaavaa piumasaaqatigisinnaallugulu.

Imm. 4. Eqqaaviit imaat uumasunit tikinneqannginnissaat qulakkeerniarlugu eqqaaviit ilusiligaassapput.

Imm. 5. Katersuisarnermut aqqissuussinernut atatillugu kommunalbestyrelsip malittarisassani eqqaavinnik aalajangersimasunik atuinissaq peqqussutigisinnaavaa. Eqqaavinnik puussiartalinnik atuinissaq peqqussutigineqarpat, puussiat katersuisarnermi aqqissuussineq aqqutigalugu tunniunneqartassapput.

§ 32. Eqqakkanik qanorluunniit ittunik inissiisoqassanngilaq tamaangaannarluunniit igitsisoqassanngilaq..

Imm. 2. Atuisinnaatitaasut tamarmik pisussaapput, illuutimik eqqaani avataaniluunniit nunaminertap atorneqartup killinganiit siumut uuttorlugu 25 meterit tikillugit, imaluunniit illup saniliusup kussernulluunniit sinaanut ungasissutsip qeqqanut akuttunngitsumik salisassallutik. Illuni namminerisamik biilnut unitarfeqartuni, pinnguarterfeqartuni assigisaanilluunniit peqartuni piginnittoq nammineerluni salisussaavoq.

Imm. 3. Aamma kommunalbestyrelsip illumik suliffeqarfimmilluunniit piginnittoq, eqqakkat illumit pineqartumit pisut peqqullugit peqqusinnaavaa.

Imm. 4. Kommunalbestyrelsip kommunimi sumiiffiit imm. 2-mi aamma imm. 3-mi ilaatinneqanngitsut tamarmik eqqiluisaartinneqarnissaat qulakkeertussaavaa.

Imm. 5. Igitassanik inissiisup imaluunniit tamaangaannaq eqqaasup eqqakkat peernissaat akisussaaffigaa.

Kommunalbestyrelsi igitassanik inissiisoq imaluunniit tamaangaannaq eqqaasoq eqqakkat peeqqullugit peqqusinnaavaa.

Imm. 6. Imm. 5-imi atuisinnaatitaasup imm. 2 naapertorlugu salinissamut pisussaaffeqarnera, imm. 3 naapertorlugu peqqussuteqasinnaatitaaneq imaluunniit imm. 4 naapertorlugu kommunalbestyrelsip saligaatsuutitsinissamut akisussaaffeqarnera killilerneqanngillat.

§ 33. Kommunalbestyrelsip illoqarfiup nunaqarfullu iluani sumiiffinni tamanit atorneqartuni tamani eqqaavilersuinissaq qulakkeertussaavaa.

Imm. 2. Kommunalbestyrelsip illoqarfiup nunaqarfullu iluani sumiiffinni tamanit atorneqartuni tamani arsakoorflersuinissaq qulakkeertussaavaa. Arsakoorfiit eqqaavinnut, imm. 1-imi taaneqartunut ilagitillugit aaqqiissutigineqarsinnaapput imaluunniit immikkoortillugit aaqqiissutigineqarsinnaallutik.

§ 34. Kommunalbestyrelsi upernaakkut nunap aattulernerani ukiakkullu sapinnginnerani tamatigut kommunimi silami nunaminertanik inuinnaat pisortat ataatsimut salinissaat pillugu allagarsiisassaaq aallartisisassallunilu.

Imm. 2. Imm. 1 naapertorlugu kommunalbestyrelsip allagarsiussaa piffissamut ataatsimoorluni saliiffissamut paasissutissanik imaqassaaq. Saliineq sumiiffinnut assigiinngitsunut agguarneqarsinnaavoq.

Imm. 3. Ataatsimoorluni saliinissaq kommunalbestyrelsip piffissaliussaata ingerlanerani maleruagassat, imm. 1-imi aamma imm. 2-mi taaneqartut malillugit ingerlanneqartassaaq.

Imm. 4. Tamatumunnga atatillugu eqqakkat, eqqakkat angisuut eqqakkallu assingusut katersorneqartut kommunalbestyrelsip allagarsiinera naapertorlugu piumasaqaatitut nalunaarutigineqartumut inissinneqassapput.

Kapitali 13

Eqqakkanik ikuallajasunik ikuallaaneq, inissitassanillu toqqortuinerit kiisalu kommunip eqqakkanik aqqiissuussineranut tunngasunik aqutsinera.

§ 35. Eqqakkat tamarmik atortuni tamatumunnga atorneqarnissaanik akuerisaasuni suliarineqartassapput.

§ 36. Eqqakkat ikuallanneqarnissaminnut naleqqutinngitsut ikuallanneqannginnissaat kommunalbestyrelsip qulakkiissavaa.

§ 37. Eqqakkat ikuallanneqarnissamut naleqquttut taamaallaat atortumi tamatumunnga akuerisami ikuallanneqarsinnaapput.

Imm. 2. Eqqakkat ikuallanneqarnissamut naleqquttut, kommunip eqqagassanut aqqiissuussineranut ilaasut aammalu eqqakkat aalajangersimasumik innersuuneqartut atortumi tamatumunnga akuerisami ikkuallatassanngorlugit innersuuneqarnissaat kommunalbestyrelsip qulakkiissavaa.

Imm. 3. Kommunalbestyrelsimiit qinnuteqartoqarneratigut sivisunerpaamik qaammatini pingasuni ammaannartumik ikuallaasarallarnissamut imaluunniit eqqakkanik ikuallanneqarsinnaasunik

toqqorsigallarnissamut, aammalu atugassarititaasut piumasaqaatillu uku naammassineqarsimanissaat apeqqutaatillugit Naalakkersuisut immikkut ittumik akuersissuteqarsinnaapput:

1) Najukkami, nunap immikkoortuani nunaluunniit tamakkerlugu eqqakkanik ikuallaavimmik avatangiisinut akuerisamik peqartinnagu, ikuallaavik akuerineqartoq ingerlatinnagu imaluunniit allanik peqquteqartumik ikuallaavik atorineqarsinnaatinnagu.

2) Piffissami atuisinnaangiffiusumi kommunalbestyrelsi eqqagassalerinermi aaqqiissutissanik tamakkiisunik sulissuteqassapput.

3) Kommuni eqqagassalerinermut pilersaarummik akuerisamik peqassaaq.

Imm. 4. Naalakkersuisut immikkut ittumik akuersissummi imm. 3 naapertorlugu piumasaqaatinik sukumiinerusunik aalajangersaasinnaapput, taakkunungalu piumasaqaatit piffissamut ikuallaaviusussamut, ikuallaariaatsinut atorineqartunut, kiisalu sanaartukkanut imeqarfillu killeqarfinut ungasissusissat minnerpaaffinut tunngasut ilaatinneqarput.

Imm. 5. Imm. 3 naapertorlugu immikkut ittumik akuersissuteqartoqannginnerani, nakorsaaneqarfimmut nunaqarfimmilu siulersuisunut tusarniaasoqaaqassaaq.

Imm. 6. Imm. 3 naapertorlugu immikkut ittumik akuersissutit nuna tamakkerlugu tusagassiuutitigut, kiisalu sumiiffimmi pineqartumi periaaseq atorineqartoq nalinginnaasoq malillugu tamanut ammasumik saqqummiunneqassapput.

Kapitali 14

Eqqakkat ulorianaatillit

§ 38. Suliffeqarfiit eqqakkanik ulorianaatilinnik pilersitsisut eqqakkat pillugit kommunalbestyrelsimut nalunaaruteqassapput.

Imm. 2. Nalunaarut, suliffeqarfimmit nalunaarutigineqartoq eqqakkat suunerinut paasisutissanik ilaqaassaaq, tak. ilanngussaq 1-imi amerlassutsit, poortuutit katitigaanerallu.

Imm. 3. Eqqakkanik pilersitsisut, imm. 1-imi taaneqartut kommunalbestyrelsimit qinnuigineqarnerminni eqqakkat eqqortumik immikkoortiterneqarnerat poortorneqarnerallu pillugu uppersaammik tunnius-sissapput.

Imm. 4. Eqqakkat ulorianaatillit kommunimi aaqqiissuussinernut pilersinneqarsimasunut tunniunneqassapput, imaluunniit innersuussutit naapertorlugit passunneqassallutik.

Imm. 5. Suliffeqarfiit eqqakkanik ulorianaatilinnik pilersitsisut, eqqakkat katitigaanerat, amerlassusaat, oqimaassusaat, annertussusaat il.il. malillugit pisariaqartitsineq naapertorlugu nalunaarsorneqarnissaat isumannaatsumillu poortorneqarnissaat qulakkiissavaat.

§ 39. Suliffeqarfiit eqqakkanik ulorianaatilinnik pilersitsisut passussisulluunniit avatangiisinut inatsimmi imaluunniit avatangiisinut inatsimmi maleruagassat tunngavigalugit maleruagassiarineqartut naapertorlugit tamatumunnga akuersissuteqartoqarsimanngippat, eqqakkat kimikinnerulersinneqannginnissaat qulakkiissavaat.

Kapitali 15

Nakkutilliineq

§ 40. Kommunalbestyrelsip eqqakkat sulluunniit, inaarutaasumik peerneqarnissaat, atoqqinneqarnissaat, iluaqutissanngortinneqarnissaat avammulluunniit nassiunneqarnissaat, imaluunniit eqqakkap eqqagaajunnaarsinneqarnissaa tikillugu passunneqarnissaat nakkutigissavaa.

Imm. 2. Tamakkiisumik ilaannakuusumilluunniit passussineq suliffeqarfimmit kommunimit ingerlanneqanngitsumit suliarineqarpat, passussinerup nalunaarut manna kommunillu innersuussutai naapertorlugit ingerlanneqarnissaa kommunalbestyrelsimit nakkutigineqassaaq.

Imm. 3. Kommunalbestyrelsip suliffeqarfiit eqqagassanik passussinermi, assartuinermi, piiaanermi atueqqinnermilu paasissutissanik, nakkutilliinerup ingerlanneqarnerani pisariaqartinneqartunik tamanik saqqummiusseqqullugit pisussaaffilersinnaavai.

Imm. 4. Kommunalbestyrelsi eqqakkanut nalunaarut manna kommunillu eqqakkanut malittarisassiai kii-salu innersuussutai naapertorlugit passunneqarnissaat immikkoortiterneqarnissaallu qulakkeerniarlugu peqqussuteqarsinnaavoq inerteqquteqarsinnaallunuunniit kiisalu innersuussutit.

Imm. 5. Nakkutilliinermut atuutsitsinermullu maleruagassat, avatangiisinut inatsimmi kapitali 12-imi aalajangersarneqartut atuutsinneqarput.

Kapitali 16

Naammagittaalliornissamut, pineqaatissiinissamut atortuulersitsinermullu aalajangersakkat.

§ 41. Nalunaarut manna imaluunniit eqqagassanut malittarisassat taanna tunngavigalugu aalajangersarneqartut naapertorlugit aalajangiinerit, avatangiisinut inatsimmi kapitali 14-imi maleruagassat naapertorlugit maalaarutigineqarsinnaapput.

§ 42. Pillaammik akiliisussanngortitsisoqarsinnaavoq, pineqartoq:

- 1) kommunalbestyrelsimut nalunaarutiginninnissamik pinngitsuuppat, tak. § 15,
- 2) paasissutissanik nalunaaruteqarnissamut, nalunaarutiginninnissamut imaluunniit uppersaatinik tunniussinissamut pinngitsuuppat, tak. §§ 10, 15, imm. 3, 16, 22, imm. 4 aamma 23, imm. 5,
- 3) eqqagassanik ulorianaatilinnik nalunaaruteqarnissamut, immikkoortiterinissamut, poortuinissamut nalunaaqtersuinissamullu piumasaqaatinik unioqqutitsippat, tak. § 36,
- 4) § 18 tunngavigalugu peqqussutinik, kommunalbestyrelsimit aalajangersarneqartunik unioqqutitsippat, tassunga katersuisarnermut aqqissuussinernik imaluunniit passussinissamut periarfissamut innersuunneqartumik atuinngitsoorneq ilanngullugu, tak. §§ 20, imm. 3, 21, imm. 3 aamma 22, imm. 3,
- 5) §§ 31, 32, imm. 2 saliinissamut pisussaaffinnik unioqqutitsippat,
- 6) § 32, imm. 1 unioqqutillugu igitassanik inissiippat tamaangaannarlunuunniit eqqaappat, imaluunniit § 32, imm. 5-imi immikkoortumi siullermi piumasarineqartutut eqqakkanik piaanngitsoorpat,
- 7) §§ 22, imm. 5, 23, imm. 3, 32, imm. 3, § 32, imm. 5-ip immikkoortuisa aappaat aamma 40, imm. 4 naapertorlugit qinnuteqaatinik peqqussutinilluunniit malinninngitsoorpat,
- 8) § 9 naapertorlugu silaannarmik, imermik, sikumik, qaqqamik nunamilluunniit mingutsitsippat,
- 9) § 37, naapertorlugu akuersissummik pissarseqqaarani eqqakkanik ulorianaatilinnik kimikinnerulersitsippat akulerussippalluunniit, imaluunniit
- 10) nalunaarut naapertorlugu kommunillu eqqagassanut malittarisassai naapertorlugit eqqakkanik, immikkoortiterinissamik igitassinissaminillu isumaginninnissaminik pinngitsuuppat/iliuseqanngippat,
- 11) § 37, imm. 3 naapertorlugu immikkut ittumik akuersissuteqarnermut piumasaqaatinik

unioqquitsippat.

Imm. 2. Suliffeqarfiit, kommunit kommunillu suleqatigiiffi imm. 1 naapertorlugu pineqaatissinneqarsinnaapput.

§ 43. Kalaallit Nunaanni pinerluttulerinermut inatsimmi kapitali 5-imi maleruagassat naapertorlugit suliffeqarfimmut pillaaammik akiliisussanngortitsisoqarsinnaavoq.

Imm. 2. Aamma nalunaarummik matuminnga unioqquitsisoqarnerani pinerluttulerinermut inatsit naapertorlugu arsaarinnittoqarsinnaavoq. Arsaarinninnermi arsaarinnissutit Nunap Karsianut iluaqutissanngortinneqassapput.

§ 44. Nalunaarut 8. januar 2021 atuutilersinneqarpoq.

Imm. 2. Tamatuma peqatigisaanik igitassanik eqqaasarneq pillugu Namminersornerullutik Oqartussat nalunaarutaat nr. 28, 17. september 1993-imeersoq, oliakunit akuutissanillu imalinnik eqqagassat pillugit Namminersornerullutik Oqartussat nalunaarutaat nr. 29, 17. september 1993-imeersoq aamma igitassanik eqqaasarnermut piumasaqaatinik immikkut akuersissuteqarnissaat pillugu Namminersorlutik Oqartussat nalunaarutaat nr. 2, 5. februar 2020-imeersoq atorunnaarsinneqarput.

Namminersorlutik Oqartussat, ulloq 7. januar 2021

Jess Svane

/

Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

